

四部叢刊初編集部

鮚埼亭集
經史問答

全氏世譜

餘姚史夢蛟竹房校

全氏出自周官泉府之後以官爲氏其後以同音通于全據國語隗姓之分亦有潞洛泉余滿五氏然全氏之所出非隗也或曰全之本姓爲王漢元后之族屬以避新都之亂易姓如輔果或曰殷王高宗之後爲全二說皆無據全氏之著名於舊史者自東漢桂陽太守柔始其子大司馬錢唐侯琮以勛伐起孫吳尚主於是江左戚里莫如全氏大司馬兄子衛將軍永平侯尚以王舅諸子鎮北將軍都亭侯緒以東關破魏功臨湘侯懌以

龔父業都鄉侯吳以國甥其餘如端如翮如緝如靖如
璋如儀如紀如熙皆以侍郎都尉典兵宿衛旣而孫琳
擅政壽春失援臨湘與諸弟諸子入魏永平誅權臣不
克遇禍全氏始衰至劉宋而光祿大夫孝寧侯景文繼
之至陳而水部郎援繼之孝寧以前多用功業起家水
部始以經術爲易詩宗臨湘之入魏也諸弟子皆封爵
故河北全氏不下江左其後高齊有黃門侍郎元起唐
末有雄武節度使中書令師朗王蜀之勛臣也又有金
州防禦使師郁仕孟氏世爲商洛豪宗今全氏舊譜指
北史諸泉

泉金父子

爲臨湘之後謂其改姓不知全氏之由

泉而改非泉氏之由全也入宋而商洛之族阻兵被夷而江左全氏復盛太平興國中有諱權者累官侍御史知青州以母憂不出奉其父由錢唐遷居鄞之桓谿則謝山先生之始祖也上溯桂陽其世二十有七侍御生二子長鼎次俎而鼎爲明州學錄故侍御來鄞其卒也葬于谿上之沙渚其時侍御弟興亦遷越之東浦無子以俎爲後越六世爲宋理宗之母家追封曾祖以下則有若太保唐公安民唐公子爲太傅越王份越王子爲太師申王大中太師徐公大節徐公卽宋史所稱保長者也申王子爲太師和王昭孫是爲度宗元舅徐公子

爲少傅節度使周公純夫少師節度使清夫和王子爲太尉參政元堅周公子爲太府卿槐卿而福王之妃亦出於全方理宗之潛龍也學于余魯公天錫之家因訪外氏于谿上嘗飲食焉旣而卽位推恩並賜官爵而桓谿諸全不欲攀外戚之寵以邀恩澤相約不出朝議高之乃選其中二人曰汝梅汝霖尚縣主而爲樹雙闕于硤上顏之曰鵲巢以表焉是後桓谿族姓分爲八派曰前宅後宅東宅西宅中宅田宅皆侍御五世孫琚之後也曰南宅北宅皆侍御五世孫禮之後也其旣於今歷年八百有餘孫枝二十六葉而谿上之居未散代有顯

者吾鄉言世家未有若此之永者也而謝山之世則自
禮而下皆有名號生卒可按自政而下始得詳其行實
禮生宗顯宗顯生得信得信生昌世昌世生明五府君
明五府君生已一府君已一府君生惟一府君惟一府
君生南十二府君四世皆佚其名南十二府君生旻旻
生乾乾生倫倫生文瑜文瑜遷于城中之湖上上距遷
桓谿之世爲十六傳文瑜生政以篤學懿行稱人師起
家明經司教常熟以子侍郎元立貴封檢討侍郎則謝
山先生之六世祖也以碩德大節在永陵講筵已而以
不肯草西內青詞外遷陪都又以忤分宜相乞身侍郎

生和州同知少微以慈惠之政著南畿稱循吏和州生
應山知縣天授文學淵奧率絲作吏未報最遽卒應山
伯子諱大和字介石號他山國子監生叔子諱大程字
襄孫號式公府學生他山府君無子以式公府君子爲
之後先生之王父也諱吾騏字聿青號北空他山兄弟
當明之季用錢忠介公薦一以大理寺左評事徵一以
太常寺博士徵俱不受丙戌以後甬句東之人遠在天
末尚煩多士多方之訓成化最晚其在世祿家子弟尤
爲甚焉而全氏一日棄諸生籍者二十四人他山府君
議以東錢湖之童叟萬山荒僻人跡罕至欲避地焉時

北空府君年十六他山府君問曰汝能絕意人世乎北
空曰謹受命卽披野服隨二父入山一門共修汐社力
耕之餘清吟而已高武部隱學嘗嘆曰謝臯羽棄其子
行遯終身不相聞問鄭所南則無子未若全氏之駢聚
也北空府君生贈公諱書字吟園以經術詩詞教授里
中最精考索重修全氏世譜山陰一支舊附見鄞譜中
贈公爲據宋史以正其官爵之譌謬舊譜稱始祖侍御
公之父仕周世宗朝官中書令贈公曰殆吳越宰相耶
十國板蕩中朝阻隔鮮有越國而仕者又稱侍御公出
青州爲同知贈公曰宋無同知州事之官蓋知州也萬

九沙太史嘗問曰孤山遜初子之詩在月泉吟社中于
先世遠近若何贈公曰此吾侍御十世孫也太師申王
大中之從子和王昭孫之兄太尉參政允堅之世父宋
亡後僑寓孤山結社以老者也蓋亦劉道原之流亞也
以先生貴贈如官謝山先生諱祖望字紹衣號謝山贈
公之仲子也贈公二子長祖謙生而慧甚四歲入家塾
一年卽能略通諸經章句蔣蓼厓先生嘆曰是聖童也
一日戲以小刀剪紙傷其指感風而病臨危於案上大
題鯉也死三字而破之曰聖人之不得有其子聖人之
不幸也時年六歲自侍御至先生爲世凡二十四云先

生文集手自編次命純繕寫甫畢而先生謝世純致書
錢唐杭堇浦先生求序其端且請作志狀堇浦以書來
命述先生世系統因述全氏世譜冠於集端昔胡助述
宋氏世譜以冠潛谿集萬斯大倣之述黃氏世譜以冠
南雷集今亦此例也門弟子董秉純敬述

年譜

餘姚史夢蛟竹房校

世系名字詳世譜

康熙四十四年乙酉正月初五日亥時先生生於鄞縣白壇里月湖之西岸先世宮詹公故宅

先生有兄祖謙慧甚六歲而殤太夫人哭之哀忽張目曰勿哀吾當再來補之後十年生先生亦慧甚故小字曰補又有傳先生爲錢忠介公轉生者其詳未之聞集中有五月十三舉子詩三首其第二首曰釋子語輪迴聞之輒加嘆有客妄附會謂我具宿根琅

江老督相于我乃前身一笑妄應之燕說漫云云昨聞正氣堂豫告將雛辰在我終弗信傳之頗驚人聊以充談助用語湯餅賓按先生年三十九始得子昭德方舉忠介後人苟庭先生入賀先生曰何知之神也苟庭曰夜來寒家影堂中不知何人揚言曰謝山得子可喜可喜故來訊耳亦一奇也

四十七年戊子先生四歲始就塾

太公吟園先生親課以四子書諸經便能粗解章句吟園先生曰是子雖不逮其兄然亦可兒也

五十一年壬辰先生八歲

諸經之外兼讀通鑑通考諸書秋社過樓外極管弦
燈火之盛不一顧也

五十七年戊戌先生十四歲補博士弟子

從里中董次歐先生讀書三餘草堂張氏次歐先生
最持崖岸弟子無敢輒前者獨先生與爭論經史曰
此吾門俊人也惜吾老矣不及見其大成也始游庠
謁學宮至鄉賢名宦諸祠見謝太僕張軍門主曰此
反覆賣主之亂賊奈何汙宮牆也取捶碎之投諸頻
池

五十八年己亥先生十五歲

里中耆英多與先生談藝一日慈谿鄭南溪先生過吟園曰吾今日特訪陳羣而來

五十九年庚子先生十六歲始應鄉試

至行省以古文調查初白先生初白謂萬九沙先生曰此劉原父之儔也

六十年辛丑先生十七歲

六十一年壬寅先生十八歲

先生有族母爲氷槎尚書女居黃巖是年返寧年八十餘矣先生從之問遺事取姚江黃先生之志楊徵士遴之紀吳農祥之傳參互質證多有補訂後卒成

尚書神道第二碑

雍正元年癸卯先生十九歲

先生嘗再登天一閣借書當始於是時又楊誠齋易傳鈔之天賜園謝氏草廬春秋纂言鈔之雲在樓陳氏皆在是年皆通志堂未刻之本世所希有者

二年甲辰先生二十歲

是年當娶前孺人張氏自昨年再過武林盡交樊榭葦浦薌林勾山谷林意林蕙田立甫諸先生討論經史證明掌故尊酒郵筒殆無虛日而簡帖題跋多不署歲月不敢附會惟與樊榭論蘇若蘭回文詩札確

係此年

三年乙巳先生二十一歲

是年當在童臬授徒先是先生曾王父王父皆避兵於是先生感之益參考舊聞成滄田錄

四年丙午先生二十二歲

是年有荆公鄴女志跋而古今通史年表大約作于此時

五年丁未先生二十三歲

武威孫公詔來守寧訪士於萬九沙太史太史力推先生孫公甚重之先生因上尊經閣祀典議及孫公